



NEWSLETTER

OLIMPIJSKOG KOMITETA BiH

No.20 jul/avgust/septembar 2023



**Dragi sportisti i sportski radnici,
Dragi prijatelji,**

Proslavili smo tri decenije od prijema Olimpijskog komiteta Bosne i Hercegovine u Međunarodni olimpijski komitet (MOK). Jubilej našeg rada je zasnovan na posvećenom djelovanju i entuzijazmu koji je kroz 30 godina izgradio platformu na kojoj će se u budućnosti razvijati i unaprijeđivati Olimpijski pokret u BiH. Obljetnicu smo uvijekječili prigodnom Akademijom, filmom i knjigom o OK BiH. Tokom svečane proslave najavili smo početak procesa kandidature za domaćinstvo olimpijskog takmičenja koje će po treći put našu zemlju osvijetliti olimpijskim plamenom. Međunarodno višesportsko takmičenje, Olimpijske igre mladih (YOG), sjajna je prilika da u naredne decenije rada implementiramo bogato olimpijsko naslijeđe Bosne i Hercegovine.

Naša ideja o organizaciji YOG-a u Sarajevu je naišla na bezrezervnu podršku olimpijskih komiteta Centralne i Jugoistočne Evrope tokom sastanka u Ljubljani, podršku Evropskih olimpijskih komiteta tokom Generalne skupštine u Istanbulu, kao i samog predsjednika MOK-a, dr Thomas-a Bach-a te predsjednika YOG komisije MOK-a, dr. Karl Stoss-a.

Naša kampanja za rješavanje sistemskog finansiranja vrhunskog sporta u BiH već je prepoznata u Ministarstvu civilnih poslova BiH, kao i u Federalnom ministarstvu kulture i sporta. Očekujemo da i drugi nivoi vlasti mijenjaju svoj odnos prema vrhunskom sportu, kako bismo sportistima pružili optimalne uslove, a mlade ljude zadržali u Bosni i Hercegovini.

Olimpijski komitet Bosne i Hercegovine nastavlja u punom kapacitetu rad na projektним aktivnostima targetirajući sve oblasti od značaja za sportsku, ali i širu zajednicu. Krajem mjeseca septembra bili smo partneri organizacije prvog Simpozijuma Zdravo starenje koji je održan povodom obilježavanja Međunarodnog dana starijih osoba sa ciljem promicanja održivog aktivnog starenja u zajednicama.

U septembru mjesecu smo uz brojne sportske i edukativne aktivnosti obilježili i Evropsku sedmicu sporta kako bi istakli prednosti aktivnog života, te podstakli građane na aktivan životni stil, bez obzira na godine ili fizičku spremnost.

Olimpijski komitet BiH će u novembru mjesecu u saradnji sa Međunarodnim olimpijskim komitetom organizovati Forum sportista OK BiH. Osnovni cilj projekta je okupljanje najboljih sportista Bosne i Hercegovine kako bi razmijenili iskustva i informacije, te se edukovali o posebnim temama poput mentalnog zdravlja, nutricionizma, društvenih mreža i ličnih brendova, motivacije, te ostalih aktuelnih tema u svijetu sporta.

Dragi sportisti,

Sve ovo radimo kako bi se vaš glas, glas sportista, čuo i kako bi donosioci odluka u Bosni i Hercegovini napokon shvatili koje su vaše realne potrebe i suštinski problemi sa kojima se susrećete, te kako bismo zajedničkim snagama nastavili kontinuitet rada na sistemskom rješavanju finansiranja sporta u BiH.

Prof. dr Izet Rađo, akademik
Predsjednik OK BiH



30 godina Olimpijskog komiteta Bosne i Hercegovine

Svečana proslava 30 godina postojanja Olimpijskog komiteta Bosne i Hercegovine

**23. SEPTEMBAR 2023. GODINE | GODIŠNJICA OD PRIJEMA OLIMPIJSKOG
KOMITETA BIH U SVJETSKU OLIMPIJSKU PORODICU**



Povodom 30. godišnjice od prijema Olimpijskog komiteta BiH u Međunarodni olimpijski komitet, 23. septembra upriličena je svečana akademija koja je okupila čelnike Evropskih olimpijskih komiteta, nacionalnih olimpijskih komiteta iz okruženja, veliki broj zaslužnih sportista, te predstavnika javnog i političkog života naše zemlje.

Sve prisutne je pozdravio predsjednik Olimpijskog komiteta Bosne i Hercegovine, akademik prof. dr. Izet Rađo.

Zvanice su imale priliku pogledati kratki film o pređenom putu Olimpijskog komiteta, od samih začetaka do danas.

Tokom svečanosti, zvanicama su se obratili: predsjednik Evropskih olimpijskih komiteta Spyros Capralos; ministrica dr sc. Dubravka Bošnjak, Ministarstvo civilnih poslova BiH; prof. dr Nađa Avdibašić – Vukadinović u ime dosadašnjih predsjednika OK BiH; predsjednik Osnivačke skupštine OK BiH, Ahmed Karabegović, olimpijac Amel Tuka i neponovljiva BiH



košarkašica Razija Mujanović. Video porukom obratio se predsjednik Međunarodnog olimpijskog komiteta, Thomas Bach, koji je naglasio da su, za ovih 30 godina, naši sportisti Bosnu i Hercegovinu čvrsto postavili na mapu svjetskog sporta.

Kratki film o 30 godina Olimpijskog komiteta, od samih začetaka do danas prikazao je kako Olimpijski komitet jedne male zemlje može napraviti velike korake.

Ovom prilikom se želimo zahvaliti svima Vama, slobodno Vas nazvavši prijateljima Olimpijskog komiteta Bosne i Hercegovine. Olimpijski komitet Bosne i Hercegovine će nastaviti sa svojim predanim radom u jačanju bh. sporta i sportskog sistema.

Kompletnu vijest pročitajte na linku [OVDJE](#).



PRIJEM ČELNIKA EVROPSKIH OLIMPIJSKIH KOMITETA I NOK-OVA U OLIMPIJSKOM MUZEJU POVODOM 30. GODIŠNJICE OLIMPIJSKOG KOMITETA BIH



Povodom proslave 30. godišnjice u veličanstvenom ambijentu Olimpijskog muzeja u Sarajevu upriličen je prijem uoči obilježavanja 30. godišnjice od članstva Olimpijskog komiteta Bosne i Hercegovine u Svjetskoj olimpijskoj porodici.

Predsjednik OK BiH akademik prof. dr Izet Rađo, potpredsjednici gosp. Marijan Kvesić i prof. dr Milanko Mučibabić, te generalni sekretar doc. dr Said Fazlagić ugodili su predsjednika Evropskih olimpijskih komiteta gosp. Spyros-a Capralos-a, kao i čelnike olimpijskih komiteta Slovenije, Turske, Hrvatske, Crne Gore, Sjeverne Makedonije i Albanije.

Zvanice je pozdravio predsjednik OK BiH acc.prof. dr Izet Rađo, koji je tom prilikom poželio toplu dobrodošlicu svim prisutnim, te iskazao posebno zadovoljstvo što će OK BiH zajedno sa prijateljima iz Olimpijskog pokreta zajednički proslaviti ovaj važan jubilej za Olimpijsku porodicu Bosne i Hercegovine.

Predsjednik Evropskih olimpijskih komiteta gosp. Spiros Kapralos je u svom obraćanju, pored komplimenata za rad i aktivnosti OK BiH, istakao zadovoljstvo što je dio obilježavanja 30. godišnjice OK BiH, te uz čestitke poželio sreću u daljem radu OK BiH i uspjesima bosanskohercegovačkih sportista.



Video prilog i izjave predsjednika Evropskih olimpijskih komiteta gosp. Spyros Capralos-a i prijateljskih NOK-ova tokom svečanog prijema pogledajte [OVDJE](#).

GOSTOVANJE PREDSJEDNIKA OK BiH DR IZETA RAĐE, POVODOM JUBILEJA OK BiH

Povodom tri decenije postojanja OK BiH, za emisiju MAGAZIN SPORT na FEDERALNOJ TELEVIZIJI, govorio je predsjednik OK BiH akademik prof. dr Izet Rađo.

Emisiju u kojoj je Predsjednik OK BiH, pored godišnjice, govorio i na teme sportskog sistema u BiH, uslova, rezultata, finansiranja vrhunskog sporta BiH, projekata OK BiH i drugih aktualnih tema, možete pogledati klikom na sliku ili [OVDJE](#).



OBRAĆANJE OLIMPIJCA AMELA TUKE, PREDSJEDNIKA KOMISIJE OLIMPIJACA NA SVEČANOJ CEREMONIJI PROSLAVE 30. GODIŠNJICE OK BiH



Poslušajte inspirativan govor bh. olimpijca Amela Tuke tokom 30. godišnjice od prijema Olimpijskog komiteta Bosne i Hercegovine u Međunarodni olimpijski komitet. Za vrijeme svečane akademije Amel Tuka se obratio u svojstvu predsjednika Komisije olimpijaca OK BiH u ime svih bosanskohercegovačkih sportista.

Nakon čestitki na značajnom jubileju za bh. sport, odavanja počasti svima koji su utkali svoje biće u Olimpijski pokret Bosne i Hercegovine i cjelokupan sportski sistem, Amel Tuka se posebno osvrnuo na problematiku finansiranja

vrhunskog sporta Bosne i Hercegovine. Video obraćanja pogledajte na [OVOM LINKU](#).

FILM O 30 GODINA POSTOJANJA OLIMPIJSKOG KOMITETA BOSNE I HERCEGOVINE

Video retrospektiva 30 godina postojanja Olimpijskog komiteta Bosne i Hercegovine u najkraćim crtama rezimira mnoštvo aktivnosti Olimpijskog pokreta u Bosni i Hercegovini tokom protekle tri decenije, od njegovog osnivanja do danas.

Pored učešća na međunarodnim višesportskim takmičenjima, OK BiH je kontinuirano radio na mnogobrojnim projektima edukacije sportista i sportskih radnika, stipendiranju vrhunskih sportista, promociji i očuvanju Olimpijskog naslijeđa i Olimpijskih vrijednosti, projektima Evropske unije, organizaciji mnoštva aktivnosti kao i kapitalnim projektima među kojim izdvajamo domaćinstvo EYOF-a 2019 kao i obnovu originalne zgrade Olimpijskog muzeja.

Olimpijski komitet BiH će nastaviti predan rad i djelovanje na unaprjeđenju i osnaživanju Olimpijskog pokreta u Bosni i Hercegovini i cjelokupnog bosanskohercegovačkog sportskog sistema. Video retrospektivu 30 godina postojanja Olimpijskog komiteta Bosne i Hercegovine pogledajte na [OVOM LINKU](#).



OLIMPIJSKE IGRE MLADIH SARAJEVO 2028 ILI 2032?



Aktuelni strateški cilj OK BiH, koji je predsjednik prof. dr Izet Rađo najavio na svečanoj ceremoniji proslave godišnjice OK BiH, kao i u TV gostovanjima, jeste organizacija trećeg po redu olimpijskog takmičenja u Sarajevu - zimskih Olimpijskih igara mladih.

Tokom sastanka olimpijskih komiteta Centralne i Jugoistočne Evrope u Ljubljani kojem su prisustvovali predstavnici OK BiH, predsjednik prof. dr Izet Rađo, potpredsjednici

gosp. Marijan Kvesić i prof. dr Milanko Mučibabić, te generalni sekretar doc. dr Said Fazlagić diskutovalo se o ideji kandidature Sarajeva za zimske Olimpijske igre mladih za 2028. ili 2032. godinu.

Tokom sastanka u Ljubljani, prezentaciju borilišta i organizacione mogućnosti predstavio je generalni sekretar OK BiH doc. dr Said Fazlagić, nakon čega je Olimpijski komitet BiH uz aplauz, dobio punu podršku olimpijskih komiteta Centralne i Jugoistočne Evrope u svojoj nakani da razvije ideju kojom bi se Sarajevo kandidovalo za ovo prestižno svjetsko takmičenje pod ingerencijom Međunarodnog olimpijskog komiteta. Naredne korake po pitanju kandidature pročitajte u nastavku vijesti na [ovom linku](#).

Ranije, tokom obilježavanja 30. jubileja OK BiH, predstavnici prijateljskih NOK-ova su posjetili olimpijska borilišta – Jahorinu, Igman i Bjelašnicu, te su uz žaljenje da, 30 godina nakon rata, nisu obnovljeni i funkcionalni puni kapaciteti, iskazali svoje oduševljenje prirodnim ljepotama, trenutnim aktivnostima, potencijalima i sportskom infrastrukturom na olimpijskim planinama. Cijeneći snagu Olimpizma i zajedništva, Olimpijski komitet BiH nastavlja predan rad na ostvarenju naših zajedničkih snova i ciljeva, iskreno vjerujući da ćemo u skorijoj budućnosti opet dočekati olimpijski plamen u Sarajevu i Bosni i Hercegovini.



AKTIVNOSTI • OK BiH

DELEGACIJA SVJETSKJE TAEKWODNO FEDERACIJE U POSJETI OK BiH



Delegacija Svjetske taekwondo federacije predvođena predsjednikom Dr. Chungwon Choue, članom Izvršnog odbora prof. dr Metin Sahin, te generalnim sekretarom Jeongkang Seo, u pratnji predsjedavajućeg Predsjedništva Taekwondo saveza Bosne i Hercegovine Samira Šarića, člana Predsjedništva Augusta Orlovića i generalnog sekretara Vedrana Čubele, posjetila je Olimpijski komitet BiH. Delegaciju su primili predsjednik OK BiH dr Izet Rađo i potpredsjednik OK BiH Marijan Kvesić. U ugodnom jednosatnom

razgovoru istaknut je odličan rad Taekwondo saveza Bosne i Hercegovine, kao i izvanredna suradnja u realizaciji mnogih projekata Taekwondo saveza BiH i OK BiH. Više pročitajte na linku [ovdje](#).

PREDsjedNIK OK BiH AKADEMIK IZET RAĐO URUČIO PEHARE FINALISTIMA TENISKOG TURNIRA „PYRAMID CUP 2023“

Na teniskom kompleksu u okviru Arheološko-turističko-sportskog parka 'Ravne 2' u Visokom od 17. do 21. jula održan je turnir „Pyramid Cup 2023“.

Predsjednik Olimpijskog komiteta BiH akademik Izet Rađo uručio je pehare finalistima turnira Neranu Fatić i Mirzi Bašić. Neranu Fatić je u finalu pobijedio kolegu iz Davis Cup reprezentacije Mirzu Bašić rezultatom 2:1 (3:6, 6:3, 10:8).

Podsjećamo da je Teniski centar Fondacije u Visokom otvorio prošle godine Novak Đoković uz prisustvo Predsjedništva OK BiH i velikog broja gostiju i medija iz cijelog svijeta.



GOSTOVANJE GENERALNOG SEKRETARA OK BiH DOC. DR SAIDA FAZLAGIĆA



Ukoliko ste propustili izdanje emisije TEMA DANA na KALMAN RADIJU, u kojoj je generalni sekretar OK BiH doc. dr Said Fazlagić govorio na temu sportskog sistema u Bosni i Hercegovini, uslova, rezultata, finansiranja vrhunskog sporta BiH i drugih aktuelnih tema, istu možete pogledati na [OVOM LINKU](#).

ODRŽAN SIMPOZIJUM „ZDRAVO STARENJE“



30. septembra 2023. godine, u prostorijama Olimpijskog komiteta BiH, održan je Simpozijum „Zdravo starenje“. Internacionalna akademija nauka i umjetnosti u BiH, pod pokroviteljstvom Ministarstva zdravstva Kantona Sarajeva i u saradnji sa Evropskom asocijacijom profesora emeritusa, Univerzitetom u Sarajevu i Olimpijskim komitetom Bosne i Hercegovine, održala je Simpozijum povodom obilježavanja Međunarodnog dana starijih osoba sa ciljem promicanja održivog aktivnog starenja u zajednicama. U sklopu projekta Evropska sedmica sporta, koji finansira Evropska komisija, čiji je koordinator Ministarstvo civilnih poslova Bosne i Hercegovine, promovisali smo važnost inkluzije i aktivnog života svih dobnih skupina u sportske aktivnosti i njenu važnost za očuvanje zdravlja.



Simpozijum je otvorio ministar zdravstva Kantona Sarajeva, prof. dr. Haris Vranić, Predsjednik Internacionalne akademije nauka i umjetnosti u BiH, akademik Asim Kurjak, potpredsjednica Internacionalne akademije nauka i umjetnosti u BiH, profesor emeritus Halima Resić, a ispred Olimpijskog komiteta Bosne i Hercegovine, prisutne je pozdravio mr. sci. Rodoljub Petković, Predsjednik komisije za edukaciju OK BiH.

Renomirani predavači, stručnjaci iz različitih naučnih oblasti održali su predavanja u oblasti svojih ekspertiza, a program je zaključen panel diskusijom.

Organizacijom Simpozijuma, Sarajevo i Bosna i Hercegovina se po prvi put pridružuju evropskim gradovima u obilježavanju i promociji ove društveno značajne oblasti. Više o Simpozijumu, predavačima, temama, kao i panel diskusiji pročitajte na linku [OVDJE](#).

SPORTSKI SAVEZI BOSNE I HERCEGOVINE

PRVENSTVO I KAMP ZA DŽUDO VETERANE U BIH



Otvoreno Prvenstvo Bosne i Hercegovine i kamp za džudo veterane održano je krajem mjeseca jula u Šipovu. Kamp je vodio Vuk Rašović, majstor 10. DAN - stepen. Na Prvenstvu su nastupali veterani iz čitave Bosne i Hercegovine kao i gosti iz Austrije, Mađarske, Makedonije i Srbije. Kampu je prisustvovao i potpredsjednik OK BiH prof. dr Milanko Mučibabić, koji je pobjednicima uručio prigodne poklone.

POVIJESNI SEMINAR ZA TRENERE I SUDIJE U TAJLANDSKOM BOKSU



„Savez tajlandskog boksa je putem izvršnog organizatora, kluba tajlandskog boksa REFLEX iz Mostara organizirao prvi službeni povijesni seminar za trenere i suce u muaythai sportu. Seminar je održan u Mostaru u prostorijama sportskog društva REFLEX, 15. 16. i 17. 09. 2023 godine. Trenerski seminar vodila je legenda muaythai sporta, tajlandčanin SAK KAOPONLEK, kojeg sa pravom zovu BLACK SPIDER. Sak je šesterostruki prvak svijeta i borac koji ima 380 mečeva, od toga 340 pobjeda i 180 nokauta. Ovom prigodom Savez tajlandskog boksa BiH je Saka proglasio počasnim članom.

Sudački seminar koji je imao skoro 200 polaznika je vodio međunarodni sudac Miljenko Kutleša - Roša. Bosna i Hercegovina je dobila nove trenere i suce koji će se daljnjom edukacijom, u organizaciji Saveza educirati nove kvalitetne trenere i suce. Ono što najviše imponira je to što su na Seminaru sudjelovali i muškarci i žene svih dobnih uzrasta sa teritorije cijele Bosne i Hercegovine. Tajlandski majstor Sak je na kraju izjavio, da do sada i svojoj karijeri nikada nije osjetio topliju i domaćinsku atmosferu, kao u Bosni i Hercegovini i Mostaru.

Ovaj Seminar je jedan veliki vjetar u leđa muaythai sportu u Bosni i Hercegovini i svim novim klubovima, koji se žele pridružiti našem Savezu i širiti ovaj sport na domaćoj i međunarodnoj sceni, te tako promovirati svoju domovinu“, saopštili su iz Saveza tajlandskog sporta BiH.

AKTIVNOSTI RAGBI SAVEZA BOSNE I HERCEGOVINE



Uz podršku Ambasade Francuske u Bosni i Hercegovini i suradnji sa Ragbi Savezom Bosne i Hercegovine Ragbi klub Čelik je održao niz edukativnih i promotivnih radionica. Tim stručnjaka na čelu sa gospodinom Raphael Boye i Damirom Uzunovićem obavio je u sklopu francuskog ragbi saveza niz treninga i edukacija u Zenici, Sarajevu, Gornjem Vakufu – Uskoplje i Mostaru. Pored

pomenutih tim su činili proslavljeni bh. internacionalac i reprezentativac Armin Vehabović i edukator Nicolas Uzunović. Edukativni treninzi u Gradu Zenica podrazumijevali su rad sa mladim igračima u klubu, promociji sa učenicima u OŠ Meša Selimović kao i studentima Odsjeka za sport Filozofskog fakulteta Univerziteta u Zenici. Promotivno edukativne radionice su obavljene u Sarajevu na Fakultetu za sport i tjelesni odgoj Univerziteta u Sarajevu te u suradnji sa NK Sloga Gornji Vakuf Uskoplje u istoimenom Gradu.

Za implementatore ovog projekta organiziran je prijem kod N.J.E. Christine Toudic ambasadorice Francuske u BiH sa ciljem promocije ovih sjajnih aktivnosti. Kompletan program je krunisan događajem u Mostaru u suradnji Ragbi kluba Čelik i Ragbi kluba Herceg u edukaciji za mlade igrače te prvim turnirom državnog prvenstva u ragbiju 7 u sklopu takmičenja koje organizira Ragbi Savez Bosne i Hercegovine. Kroz ove sjajne aktivnosti više stotina dječaka i djevojčica imali su priliku probati ovaj sjajni sport, a mnogi unaprijediti svoje vještine. Ovo je svakako odlična podloga za razvoj i osnivanje novih klubova u Bosni i Hercegovini.

MEĐUNARODNI ARBITAR RAGBI SAVEZA BOSNE I HERCEGOVINE

Kao predstavnik Ragbi saveza Bosne i Hercegovine, Mirza Oruč međunarodni ragbi sudac 'dijelio' je pravdu na drugom turniru u konferenciji Trophy u Rugby Sevens u organizaciji Rugby Europe. U stručnom dijelu turnira učestvovala su sudije iz Francuske, Portugala, Ukrajine, Holandije, Hrvatske te samim tim učešće BiH sudije predstavlja do sada i najveći rang koji je sudio jedan od naših sudaca u ragbi takmičenjima, saopštili su iz Ragbi saveza BiH.



U18 REPREZENTACIJA BOSNE I HERCEGOVINE



Nakon dužeg niza godina ponovo je formirana reprezentativna selekcija U18 Bosne i Hercegovine koja je učestvovala u ragbiju 7 na Evropskom prvenstvu koje se održalo od 21.-23.07.2023 godine u Poljskoj u mjestu Zabki. Izabranici selektora Uzunovića su učestvovali u grupnoj fazi (grupa A) natjecanja sa selekcijama Poljske, Hrvatske, Mađarske i Bugarske. "Iako rezultat nije bio na našoj strani selekcija je izborila uslove za učešće na narednom Evropskom prvenstvu. Ovo je izuzetno važna promocija jer je ragbi 7 trenutno najmlađi olimpijski sport", izjavili su iz Saveza.

CHEERLEADING SAVEZ BIH



Cheerleading i plesni klub Let's Dance Nevesinje je organizovao cheerleading kamp za svoje članove u periodu od 28 - 30. jula ove godine. Kamp su vodili licencirani ICU treneri iz Mađarske, Kiss Balazs i Luca Par. Na kampu je učestvovalo oko 70 djece, a učile su se osnove cheerleadinga.

Cheerleading i plesni klub Let's Dance Nevesinje je 08. avgusta organizovao svoj godišnji koncert pod nazivom „Let's Dance i prijatelji“, na kome je učestvovalo oko 150 djece iz Nevesinja i okoline. Na koncertu su prikazali koreografije sa kojima su se takmičili u prethodnoj sezoni 2022/2023. Koncert je bio humanitarnog karaktera za udruženje „Pomozi mojoj nevjeri“ iz Mostara.

AKTIVNOSTI SAVEZA DIZAČA TEGOVA BIH EVROPSKO JUNIORSKO I U23 PRVENSTVO



Na Evropskom Juniorskom i U23 Prvenstvu koje je održano u Bukureštu nastupio je bh. takmičar Faris Durak, koji je opravdao očekivanja. Faris je oborio seniorski rekord BiH u izbačaju, podigavši 118 kg, i time pokazao stalni rast forme i rezultata. Ovim rezultatom takmičar je osvojio peto mjesto, što je drugi najbolji plasman svih vremena za Bosnu i Hercegovinu nakon prošlogodišnjeg osvajanja

četvrtog mjesta na Evropskom U23 prvenstvu Amine Mašić.

Pored takmičara, kuriozitet učešća bh. predstavnika je suđenje Amine Mašić, koja je prošle godine bila takmičar na ovom prvenstvu (Juniorsko i U23 Evropsko Prvenstvo u Durresu), a ove godine je sudila i bila najmlađi međunarodni sudija na ovom Prvenstvu i ujedno najmlađi međunarodni sudija na bilo kojem Evropskom prvenstvu ikada. Pored Amine Mašić, Evropska Federacija je za suđenje izabrala i bh. sudiju Nedima Mašića.



SPECIJALNA OLIMPIJADA BIH I UNFPA U ZAJEDNIČKOM INKLUZIVNOM PROJEKTU KROZ SPORT



Bosna i Hercegovina je zemlja bogate kulturne raznolikosti i naslijeđa, ali i društva koje se suočava s izazovima inkluzije i integracije mladih i osoba s posebnim potrebama. U ovom kontekstu, saradnja između Populacijskog fonda Ujedinjenih nacija (UNFPA) i Specijalne Olimpijade Bosne i Hercegovine (BiH) predstavlja svjetionik nade. Projekat, finansiran od strane Ambasade Italije u BiH, postavlja inkluziju kroz sport kao ključno sredstvo za spajanje mladih i upoznavanje različitih kultura. Ovaj ambiciozni projekat se širi kroz sedam gradova u Bosni i Hercegovini, obuhvatajući Sarajevo, Istočno Sarajevo, Banju Luku, Tuzlu, Brčko, Bijeljino i Bosanski Petrovac. Svaki od ovih gradova ima svoju jedinstvenu priču i izazove, ali kroz ovu saradnju postaju dijelom šireg pokreta za inkluziju i razumijevanje, čime se njegov značaj proteže i izvan sportskih terena.



UNFPA i Specijalna olimpijada BiH ovim projektom stvaraju put prema inkluzivnijem i raznolikijem društvu u Bosni i Hercegovini. Kroz sport, mladi se povezuju i uče o različitim kulturama, stvarajući tako temelje za svijetlu budućnost u kojoj se svi građani cijene i podržavaju. Ambasada Italije igra ključnu ulogu u ostvarivanju ovih ciljeva, pružajući podršku projektu koji pokreće promjene i potiče inkluziju kroz sport i kulturu.

Projekt je započeo na Međunarodni dan mladih u Centru „Safet Zajko“ u Sarajevu, a u njega je uključeno više od stotinu učesnika iz sedam bosanskohercegovačkih gradova. Inkluzivne ekipe iz Sarajeva, Istočnog Sarajeva, Brčkog, Bijeljine, Bosanskog Petrovca i Banja Luke učestvovali su u Sarajevu u inkluzivnom fudbalskom treningu, inkluzivnom turniru u košarci, šahovskim radionicama i radionicama o italijanskoj i bosanskohercegovačkoj kulturi i tradiciji.

Direktorica Specijalne olimpijade BiH prof. dr. Kada Delić Selimović naglasila je na ceremoniji svečanog otvaranja festivala da se inkluzivne sportske aktivnosti implemetiraju na osnovu strategije Evropske Specijalne olimpijade, za period 2021-2024 i da je ovaj projekat pokazao još jednom da smo na pravom putu da inkluzija zaživi u BiH. Obraćanje gospodina Hectora Ramireza dovoljno govori i ističe važnost inkluzije i doprinose UNFPA projektu inkluzije kroz sport i kulturu u Bosni i Hercegovini. Više o projektu pročitajte na linku [OVDJE](#).

BH • TEAM LJETNI EYOF MARIBOR 2023



XVII po redu Ljetni Evropski omladinski olimpijski festival (EYOF) Maribor održan je od 23. do 29. jula 2023. godine u istoimenom slovenačkom gradu. Sa više od 30 godina tradicije, EYOF je najveće višesportsko takmičenje za mlade evropske sportiste od 14 do 18 godina. 3.600 najboljih mladih sportista iz 48 evropskih zemalja branilo je boje svojih država na ovom takmičenju u deset sportova: atletika, biciklizam, gimnastika, rukomet, džudo, plivanje, tenis, odbojka, skejtbord i košarka 3x3. Bosnu i Hercegovinu je predstavljalo devet sportista iz četiri sporta.

Atletika: Emina Omanović, Bakir Musić, Najla Prašljivić, Ermin Beganović i Elma Hasanbašić; **brdski biciklizam:** Emrah Ljubuškić; **gimnastika:** Katja Vujičić; **džudo:** Amina Merjem Hebib i Adrian Đurđević. U pratnji sportista su bili šefica misije Samra Jurišić i treneri: Karim Hebib, Vahida Kozić, Velimir Zahirović, Kada Delić Selimović, Adnan Mekić i Saša Kovačević.



BiH sportiste koji su učestvovali na XVII ljetnom EYOF-u Maribor 2023 posjetili su predsjednik OK BiH akademik dr. sci Izet Rađo, potpredsjednik OK BiH prof. dr Milanko Mučibabić te predstavnici Ambasade Bosne i Hercegovine u Sloveniji Biljana Marilović, otpravnik poslova i Aida Hota, savjetnik. Tokom posjete sportisti i treneri su razgovarali o uslovima boravka i učešća na ovogodišnjem ljetnom izdanju Evropskog omladinskog olimpijskog festivala Maribor 2023. Sportistima su nakon ugodnog druženja, čelnici Olimpijskog komiteta BiH, kao i predstavnici Ambasade Bosne i Hercegovine u Sloveniji poželjeli puno uspjeha.

MEDITERANSKE IGRE NA PIJESKU HERAKLION 2023



Tim Bosne i Hercegovine je učestvovao na trećim Mediteranskim igrama na pijesku Heraklion 2023. Igre su održane od 09. do 16. septembra 2023, a BiH je predstavljalo četvero sportista u sportu karate/kata u pratnji trenera i šefa misije: Isidora Borovčanin, Ilda Muzurović, Tarik Salkić, Miralem Jašarspahić i trener Mujo Gec.

Sportisti su ostvarili sljedeće rezultate:

Tarik Salkić i Miralem Jašarspahić 9. mjesto

Ilda Muzurović 13. mjesto

Isidora Borovčanin 18. mjesto

Trener bh. karate tima Mujo Gec je izjavio da je zadovoljan nastupom mlade reprezentacije BiH koja je ostvarila zapažen uspjeh samim tim što je po prvi put učestvovala na Mediteranskim igrama na pijesku, te uzimajući u obzir da su učestvovala zemlje Mediterana koje dominiraju u karateu na evropskoj i svjetskoj sceni.

Tokom nastupa naše takmičare su posjetili i bodrili članovi Predsjedništva OK BiH, predsjednik dr Izet Rađo, potpredsjednik gosp. Marijan Kvesić i potpredsjednik prof. dr Milanko Mučibabić, koji su u Heraklionu boravili povodom učešća na Generalnoj skupštini Međunarodnog komiteta mediteranskih igara.



LANA PUDAR NASTAVLJA NIZATI ISTORIJSKE USPJEHE! DVOSTRUKA SVJETSKA JUNIORSKA PRVAKINJA ZA 2023. GODINU! Najbolja juniorka Prvenstva | Dvije zlatne medalje i jedna srebrena



Foto: [Instagram Lana Pudar](#)

Od 4. do 9. septembra u izraelskom gradu Netanya održano je Svjetsko juniorsko prvenstvo u plivanju, na kome je sudjelovalo 640 plivača iz 94 zemlje.

Na ovom Prvenstvu, naša olimpijka, najbolja bh. plivačica Lana Pudar, osvojila je dvije zlatne medalje i jednu srebrenu te je proglašena najboljom juniorkom u pojedinačnim kategorijama.

Osvajanjem tri medalje, Lana Pudar je Bosnu i Hercegovinu pozicionirala u svjetski vrh, odnosno na 4. mjesto u ukupnom poretku zemalja prema broju osvojenih medalja.

U disciplini 200 metara delfin, Pudar je u utrci za zlatnu medalju isplivala vrijeme 2:07.20. Srebrenu medalju je osvojila u disciplini 50 metara delfin sa vremenom 26:26, te je nakon već dvije isplivane utrke, u disciplini 100 metara, osvojila još jednu zlatnu medalju isplivavši vrijeme 57.77!

Naša olimpijka je prethodno nastupila na Svjetskom seniorskom prvenstvu koje je održano u Fukuoki (Japan) u julu mjesecu gdje je osvojila 4. mjesto u disciplini 200 metara delfin sa vremenom 2:07.05! Na istom takmičenju u disciplini 100m Lana je zauzela 10. mjesto.

Ponosni na sve njene uspjehe i rezultate još jednom čestitmo Lani, njenom timu i Plivačkom savezu BiH.



Lana Pudar tokom posjete Olimpijskom komitetu Bosne i Hercegovine sa trenerom prof. dr Damirom Đedovićem i predsjednikom Olimpijskog komiteta BiH dr Izetom Rađom.

ISTORIJSKI USPJEH LEJLE NJEMČEVIĆ | UKUPNI POBJEDNIK SVJETSKE SERIJE U DISCIPLINI CROSS-COUNTRY MARATON



Foto: [Instagram LEJLA NJEMČEVIĆ](#)

Lejla Njemčević je osvojila Svjetsku seriju u disciplini cross-country maraton koja se sastojala od četiri utrke Svjetskog kupa! Lejla je pobjednički trofej dobila nakon posljednje utrke u američkom Snowshoeu.

Njemčević je tokom četiri utrke sakupila 800 bodova, drugo mjesto je pripalo Njemici Bettini Janas koja je osvojila 520, dok je na trećem mjestu završila Litvanka Katazina Sosna sa 500 bodova.

Lejla je u Češkoj bila prva, u Italiji i Francuskoj druga, a u Snowshoeu je bila četvrta. "Nevjerovatan je osjećaj podići najveći trofej u brdskom biciklizmu i ostvariti naš najbitniji cilj za ovu sezonu. Sezona je bila nevjerovatno iscrpljujuća, sve utrke su bile preko 100 kilometara dužine i 6 sati utrkivanja, međutim znali smo da konstantnim dobrim nastupima mogu osvojiti Svjetsku seriju i pokazati da sam broj jedan na svijetu. Osvajanje svjetske serije je sjajan motiv

za narednu sezonu u kojoj će naš cilj biti da odbranimo titulu", rekla je Njemčević, lider na Svjetskoj UCI cross-country maraton ranking listi.

Prije podizanja pobjedničkog pehara Svjetske serije, Lejla je u avgustu mjesecu nastupila na Svjetskom prvenstvu u Škotskoj gdje je osvojila 4. mjesto.

"Najveće Svjetsko prvenstvo sa stazom koja je brutalna i s ekstremnim vremenskim uslovima. Lejla se borila za medalju, ali u nekim trenucima je nedostajalo i sreće. Nakon pet sati i 20 minuta, Lejla je u šprintu osvojila četvrto mjesto", izjavili su iz Lejlinog tima.

Upućujemo iskrene čestitke Lejli Njemčević, njenom timu i Biciklističkom savezu BiH na ovom izuzetnim uspjesima!



Foto: [Facebook LEJLA NJEMČEVIĆ](#)

IZUZETNO USPJEŠAN NASTUP NA EVROPSKOM TAEKWONDO PRVENSTVU TALLIN 2023



Bosanskohercegovački taekwondoisti su imali izuzetno uspješan nastup na Evropskom taekwondo prvenstvu u olimpijskim kategorijama i Evropskom taekwondo prvenstvu za juniore koje je održano proteklog vikenda u Talinu. Medalje su osvojili:

Sara Pidro srebro (Evropsko juniorsko prvenstvo);
Ada Avdagić bronza (Evropsko prvenstvo u olimpijskim kategorijama);
Nadina Mehmedović bronza (Evropsko prvenstvo u olimpijskim kategorijama);
Benjamin Husić bronza (Evropsko juniorsko prvenstvo).

“Moram istaći da smo nekako brzo ispratili našu juniorsku i seniorsku reprezentaciju u olimpijskim kategorijama u Tallin, i evo možemo slobodno reći da je to zlatna generacija kadeta koja je prije par godina bila druga na Evropskom prvenstvu da su sada ostvarili impozantne rezultate na juniorskom evropskom prvenstvu što znači da možemo očekivati da ćemo u narednim godinama imati dobre seniore koji će ostvarivati dobre rezultate”, kazao je Samir Šarić, predsjedavajući predsjedništva Taekwondo saveza BiH. Čestitke našim takmičarima, trenerima i Taekwondo savezu BiH!

SVJETSKO PRVENSTVO ZA KADETE SARAJEVO 2023

Predstavnica Bosne i Hercegovine, Lamija Alihodžić je na Svjetskom taekwondo kadetskom prvenstvu, održanom u Sarajevu, u kategoriji preko 176 cm osvojila prvu medalju u olimpijskom taekwondo sportu i tako ispisala historiju u kategoriji kadeta na ovom nivou takmičenja.

Alihodžić je bila slobodna u prvom kolu voljom žrijeba, a u četvrtfinalu je slavila u meču sa predstavnicom Italije rezultatom 2:0. U polufinalnom meču zaustavljena je od predstavnice Irana koja je kasnije postala prvakinja svijeta. Čestitke!



LARISA CERIĆ BRONZANA NA GRAND SLAM TURNIRU U BAKUU



Najbolja bh. džudistkinja Larisa Cerić osvojila je bronzanu medalju na Grand Slamu u Bakuu u kategoriji +78 kilograma.

Nakon što je prethodno opravdala ulogu prve favoritkinje na European Judo Openu Sarajevo 2023, rezultatom iz Bakua Cerić je potvrdila da se nalazi u odličnoj formi. Na prestižnom takmičenju popularna Lara osvojila je i dodatnih 500 bodova za olimpijsku normu, te je tako učvrstila poziciju među putnicima za Olimpijske igre koje će se 2024. godine održati u Parizu.

„Sretna sam jer sam uspjela da osvojim bronzu na Grand Slam turniru i da osvojim novih 500 bodova na olimpijskoj ranking listi. Dan je bio jako težak i naporan, imala sam pet borbi, u prvom kolu sam radila sa predstavnicom Austrije, poslije toga sa predstavnicom Srbije, te sam u četvrtfinalu poražena od predstavnice Japana i na kraju u repasažu sam pobjedila predstavnicu Italije“, kazala je Cerić. Više na linku [ovdje](#).

LARISA CERIĆ, ANĐELA SAMARDŽIĆ I NIKOLA PLJEVALJČIĆ ZLATNI NA EUROPEAN OPEN SARAJEVO 2023



European Judo Open Sarajevo 2023, koji je održan 16 - 17.09. u tehničkoj organizaciji Džudo saveza Bosne u Hercegovine bio je izuzetno uspješan za najbolje judoke naše zemlje. Zlatnim medaljama okitili su se Larisa Cerić (+78 kg), Anđela Samardžić (-57 kg) i Nikola Pljevaljčić (-100 kg). Srebra su osvojili Aleksandra Samardžić (-70 kg) i Toni Miletić (-90 kg), dok je Sara Marić (+78 kg) slavila u meču za bronzano odličje.

Naime, uz osvojena tri zlata, dva srebra i jednu bronzu, naša reprezentacija je prestižno međunarodno takmičenje koje se boduje za svjetsku ranking listu, a samim tim i Olimpijske igre, okončala kao najuspješnija selekcija. Čestitke sportistima i Džudo savezu na osvojenim medaljama, te još jednoj u nizu izvanrednih organizacija međunarodnih takmičenja! Pročitajte više na [ovom linku](#).



TARIK KUNOVAC BRONZANI NA EVROPSKOM JUNIORSKOM PRVENSTVU U OLIMPIJSKOM BOKSU



Na Evropskom juniorskom prvenstvu u olimpijskom boksu koje se održalo u Ploiesti, Rumuniji, bh. reprezentativac Tarik Kunovac je osvojio bronzanu medalju. Kunovac je u osmini finala savladao predstavnika Slovenije, te je pobjedom protiv predstavnika Hrvatske u četvrtfinalu osvojio bronzanu medalju.

Tarik je u polufinalu boksao meč sa iskusnijim protivnikom iz Albanije, koji je ipak odnio pobjedu u polufinalnoj borbi. U četvrtfinale Prvenstva se plasirao i Emir Kunovac koji je nažalost poražen od Čeha u skoro izjednačenoj borbi.

Čestitke Tariku, klubu, selektoru Fetahoviću i Bokserskom savezu BiH.

TARIK OMERAGIĆ | ODLIČAN NASTUP NA MEĐUNARODNOM TAKMIČENJU U BRZOM KLIZANJU "BORMIO CUP"

Seniorski reprezentativac i najbolji brzoklizač Bosne i Hercegovine, Tarik Omeragić, nastupio je na međunarodnom takmičenju u brzom klizanju "Bormio Cup", koje je održano od 27.09. do 01.10.2023. u Bormiju (Italija).

U konkurenciji 41 takmičara iz 9 zemalja, Tarik Omeragić je imao odličan nastup, iako je ovo njegovo prvo natjecanje u novoj klizačkoj sezoni (2023/2024). Na 500 m isklizao je novi državni rekord u vremenu 41,908 s (18. mjesto), dok je na 1500 m postavio lični rekord u vremenu 2:16:719 (19. mjesto), Na 1000 m zauzeo je 13. mjesto.

Pored odličnih nastupa i rezultata u Bormiju, Tarik je ostvario i zadanu normu definisanu pravilima Međunarodne klizačke unije (ISU) i Pravilnikom Saveza klizačkih sportova Bosne i Hercegovine te obezbijedio nastup u seniorskoj konkurenciji na Evropskom i Svjetskom prvenstvu u brzom klizanju.



Nakon takmičenja u Italiji, naš reprezentativac nastavlja pripreme u Francuskoj, odakle putuje za Kanadu, gdje će nastupiti na dva svjetska kupa koji se održavaju od 20. do 29. oktobra u Montrealu.

MESUD PEZER - PRVAK BALKANA



Olimpijac Mesud Pezer je hicem 20.55 metara osvojio prvo mjesto na Balkanskom prvenstvu koje je održao u julu mjesecu u Kraljevu.

“Sretan sam zbog ovog uspjeha, ponosan sam što sam kao predstavnik svoje države osvojio prvo mjesto na Balkanskom prvenstvu za seniore. Nastavljam s daljim radom i očekujem još bolje rezultate na sljedećim takmičenjima”, izjavio je Mesud Pezer.

GIMNASTIKA | PRVI BALKANSKI ŠAMPIONAT U CRNOJ GORI



Od 13. do 19. septembra u Crnoj Gori je održan prvi Balkanski šampionat u ritmičkoj gimnastici sa individualnim i grupnim programom. Uz učešće predstavnika zemalja Balkana, juniorska reprezentacija Bosne i Hercegovine je u ukupnom poretku zauzela drugo mjesto, osvojivši srebrno odličje, dok je prejuniorska reprezentacija u ukupnom poretku



zauzela treće mjesto, odnosno bronzano odličje. Iz Gimnastičkog saveza BiH ističu da je ovo istorijski uspjeh reprezentacije i prvo osvajanje medalje na zvaničnim takmičenjima, te najavljuju da je Sarajevu i Gimnastičkom savezu BiH dodijeljeno domaćinstvo i organizacija narednog Balkanskog šampionata 2024. godine.


MARINO DUGANDŽIĆ PRVAK SVJETSKOG SAMBO KUPA



Na Svjetskom kupu koji je održan u Novom Sadu (SRB) nastupili su reprezentativci iz 17 država. Reprezentaciju Bosne i Hercegovine predstavljala su dva člana: Marino Dugandžić koji je postao prvak Svjetskog kupa u kategoriji do 98 kg (combat sambo) i Srđan Ajvaz koji je zauzeo 5. mjesto u kategoriji do 88 kg (sportski sambo).

“Ovo što mi pravimo u sambo sportu je nešto nestvarno, nešto što zasigurno treba podršku da bi u klubu nastavili ovaj sjajan niz. Obzirom da klub postoji tek od 2018. godine, a sa natjecanjima krenuo od 2021. godine, mišljenja sam da nimalo ne zaostajemo u cijeloj regiji što se ovog sporta tiče. Samo od 2021. godine klub je u Mostar i BiH donio dva 5. mjesta sa Svjetskog prvenstva, 4. Europske medalje, 2. Balkanske medalje i posljednju i to zlatnu sa Svjetskog kupa za seniore”, istakao je Majo Česko trener Sambo klub Neretva.

MEĐUNARODNI KARLING TURNIR



U maju mjesecu u Beogradskoj ledenoj dvorani „Pionir“ održan je međunarodni karling turnir na kome je učestvovalo 20 ekipa iz 13 zemalja.

Reprezentaciju Bosne i Hercegovine predstavljali su juniori Ana Klepić i Aleksa Cincar, koji su imali čast dijeliti ledenu podlogu sa osvajačima mnogih internacionalnih medalja kao i sa učesnicima olimpijskih igara.

Nastup na međunarodnom karling turniru je pružio sjajno iskustvo našim mladim takmičarima.

Karling savez Bosne i Hercegovine napreduje velikim koracima na daljoj afirmaciji i razvoju ovog atraktivnog olimpijskog sporta, čiji počeci su vezani za EYOF Sarajevo i Istočno Sarajevo 2019.

MEĐUNARODNO ALPE ADRIA MOTOCROSS PRVENSTVO BIH UKUPNO TREĆA, KOJIĆ PRVAK AAMXC 2023



Izvanredne vijesti za BiH i Moto Savez BiH po završetku ovogodišnjeg izdanja Alpe adria Motocross prvenstva.

BiH je u konkurenciji 10 zemalja u ukupnom poretku osvojila 3. mjesto iza Hrvatske i Srbije.

Mario Kojić je osvojio Prvenstvo i postao ovogodišnji prvak Alpe adria u Klasi MX1. Rok Krajc je završio na odličnom 3. mjestu, dok je Teu Vidaku malo nedostajalo za postolje (ukupno 4.) u Klasi MX2.

Naši mladi juniori su također postigli sjajne rezultate. U klasi MX65 Mirko Andrić je ukupno drugi, a u klasi MX85 Antonio Topalović ukupno trećeplasirani.

U Alpe adria MX prvenstvu je nastupilo preko 90 vozača iz 10 zemalja, dok je na utrkama voženim u sklopu Alpe adria prvenstva u svim klasama nastupilo ukupno oko 200 vozača. Na istim utrkama je uz nabrojane nastupilo još 20-ak vozača iz BiH, čija kvaliteta i rezultati iz godine u godinu vidno rastu.

Ovo su do sada najbolji međunarodni rezultati Motociklističkog saveza Bosne i Hercegovine u međunarodnoj konkurenciji.



EU PROJEKTI

OLIMPIJSKI KOMITET BIH OBILJEŽIO EVROPSKU SEDMICU SPORTA



U sklopu projekta Evropska sedmica sporta, koji finansira Evropska komisija, čiji je koordinator Ministarstvo civilnih poslova Bosne i Hercegovine, obilježili smo Evropsku sedmicu sporta kroz niz aktivnosti u sedmici 23-30.09.2023. godine. Kroz obilježavanje Evropske sedmice sporta istakli smo važnost inkluzije i aktivnog života svih dobnih skupina u sportske aktivnosti i njenu važnost za očuvanje zdravlja.

U Evropskoj sedmici sporta sa Olimpijskim komitetom Bosne i Hercegovine družili su se prof. dr Milanko Mučibabić, potpredsjednik OK BIH | džudo; Tomislav Cvitanušić | najbolji bh. alpinista; Sejfo Šehović | dizanje tegova; Amel Tuka | atletika; Ada Avdagić | taekwondo; Fudbalski klub Valter; Klub ritmičke gimnastike "BOSNAGYM".

Domaćin prve aktivnosti Olimpijskog komiteta BiH u sklopu Evropske sedmice sporta 2023, pod sloganom „Be Active“ bila je Srebrenica u sklopu 3. škole fudbala za djevojčice i djevojke čiji partneri su FK Guber i FK GDM Novi Sad, a kojem su prisustvovala brojne zvanice iz Sarajeva, Novog Sada i Srebrenice.

- #BeActive promotes involvement in physical activity for a healthy life
- #BeActive fosters inclusion in all kinds of sport
- #BeActive encourages new and innovative ways to practice sport
- Join the movement!



OCEAN SEMINAR



REDUCE YOUR CARBON FOOTPRINT



Olimpijski komitet Bosne i Hercegovine sa timom olimpijske porodice (21) nastavlja edukacije u polju mjerenja karbonske neutralnosti i sprječavanja emisije štetnih gasova u budućnosti.

“OCEAN” Erasmus+ projekt finansiran od strane EU, čiji je koordinator European Olympic Committees (EOC), u maju je započeo sa edukacijama koje sprovode partneri ÖKO Instituta iz Njemačke.

Drugi u nizu seminara za jačanje kapaciteta evropskih nacionalnih olimpijskih komiteta u cilju podizanja svijesti, te pružanja potrebnih alata karbonske neutralnosti i održivosti sportskih disciplina u budućnosti, održan je u septembru.

Od oktobra mjeseca očekuje nas niz seminara u sklopu Modula 2 kako bi zajedničkim radom

stvorili put do održivog razvoja i karbonske neutralnosti!

ERASMUS+ SPORT AS VALUE

Projekat „Sport kao vrijednost“ koji finansira Erasmus+ promovise i integriše pozitivne vrijednosti sportskih aktivnosti unutar Balkana.

Olimpijski komitet Bosne i Hercegovine je ponosan da zajedno sa zemljama učesnicama (Italija, Kosovo, Crna Gora, Albanija, Malta i Portugal) provodi glavne ciljeve projekta, koji su:

- izgradnja kapaciteta sportskih klubova, organizacija i saveza da integrišu pozitivne vrijednosti u sportsku praksu na strukturiran, dinamičan i sistematičan način;
- izgradnja jače zajednice i mirnog društva kroz sport i promociju vrijednosti EU u historijski fragmentiranom regionu.



INTEGRACIJA POZITIVNIH VRIJEDNOSTI U SPORTSKU PRAKSU I IZGRADNJE JAČE
ZAJEDNICE KROZ SPORT I PROMICANJE EU VRIJEDNOSTI



Radujemo se stvaranju održivih, dugotrajnih partnerstava u regionu Balkana, sa vještim i obrazovanim organizatorima koji će uspješno promovirati pozitivan uticaj sporta i vrijednosti u sportu koji će rezultirati jačim, mirnijim i povezanim društvima.




INTERVJU SA...
**AMELOM
TUKOM**

OK BiH: *Amele, nedavno si boravio na Forumu sportista Međunarodnog olimpijskog komiteta. Kakve su tvoje impresije vezano za ovaj događaj?*

AMEL TUKA: Važan susret, puno važnih ljudi, važne teme. Na Forumu sportista učestvovao sam kao predsjednik Komisije sportista Olimpijskog komiteta Bosne i Hercegovine. Ovogodišnji 11. po redu Međunarodni forum sportista održao se od 1. do 2. oktobra u švicarskoj Lozani i okupio je više od 400 predstavnika sportista iz zemalja članica MOK-a. Pozvani su predstavnici svih nacionalnih olimpijskih komiteta i međunarodnih federacija, kao i predstavnici Organizacijskih odbora Olimpijskih igara, Svjetske antidoping agencije (WADA), Međunarodnog paraolimpijskog komiteta i Svjetske asocijacije olimpijaca, i članovi Komisije za pratnju sportista MOK-a. Meni je pripala velika čast i odgovornost da ispred svih naših sportista predstavljam Olimpijski komitet i Bosnu i Hercegovinu na ovom veoma važnom skupu. Bila je to prilika da se na najvišem nivou pozabavimo najvažnijim pitanjima s kojima se sportisti suočavaju, da podijelimo iskustva i razgovaramo o tome kako ojačati globalnu mrežu komisija sportaša. Također, u okviru rada Foruma nastojao sam pridobiti naklonost predstavnika Međunarodnog olimpijskog komiteta da još više unaprijedimo olimpijski sport u našoj domovini. Moram istaći da sam i ovoga puta u razgovorima koje sam imao u Lozani primijetio da Olimpijski komitet Bosne i Hercegovine, zbog svega što je do sada uradio, uživa veliki ugled u međunarodnim krugovima, počev kod predsjednika MOK-a, Thomas-a Bach-a, pa nadalje.

OK BiH: *U svojstvu predsjednika Komisije sportista OK BiH imaš čast, ali i veliku odgovornost da predstavljaš glas sportista Bosne i Hercegovine. Koja su osnovna i najprioritetnija pitanja kojima se nadležni u BiH trebaju posvetiti kako bi sportisti imali uslove za postizanje vrhunskih rezultata?*





AMEL TUKA: Najveći izazov svakako je izboriti se za sistemsko rješenje, za zakon koji će na nivou države riješiti prije svega pitanje finansiranja reprezentativnog sporta i svih naših reprezentacija. Uspjesi koje postižu naši reprezentativci u svim sportovima ravni su čudima, s obzirom na uvjete u kojima se spremaju za takmičenja u odnosu na konkurenciju. Zamislimo kakve bi tek uspjehe svi oni imali da imaju makar iste uvjete kao i svi ostali sportisti svijeta sa kojima se takmiče. Sport i sportisti predstavljaju svoju državu. Sport ne poznaje granice uspjeha, ali ni razlike među ljudima. Svi naši sportisti žele sistemsko rješenje, sva naša javnost želi sistemsko rješenje, pa kada je tako, moramo učiniti sve da ga dobijemo. Sport je koristan i potreban. Sport je plemenit. Sport spaja, ujedinjuje i inspiriše. Ovaj zadnji korak moramo uraditi svi zajedno. Moramo omogućiti da sve buduće generacije sportista Bosne i Hercegovine imaju iste uvjete kao i svi sportisti svijeta. S moje strane mogu obećati da ću kao predsjednik Komisije olimpijaca Olimpijskog komiteta Bosne i Hercegovine preuzeti odgovornost u tom smislu i boriti se do končanog rješenja i pobjede, kako uostalom i priliči jednom sportisti i olimpijcu.

OK BiH: *Očekuje nas veliki događaj u OK BiH, Forum sportista OK BiH koji će okupiti najbolje bh. sportiste. Koja je osnovna zadaća Foruma sportista OK BiH i koje poruke će biti poslone nakon ovog značajnog događaja?*

AT: Za Forum sportista Olimpijskog komiteta Bosne i Hercegovine možemo već sada kazati da je najveći i najznačajniji te vrste do sada. Sudeći po temama kojima će se baviti Forum, jasno je da ćemo koristiti i rezultate moći mjeriti dugoročno. Eminentni predavači govorit će o ukupno šest tema: Athlete 365 platforma, mentalno zdravlje sportista, prehrana sportista (nutricionizam), društvene mreže i lični brendovi, motivacija, te integritet u sportu. Dakle, imat ćemo priliku saznati sve ono što zanima svakog sportistu u ovom trenutku, kako bi svi oni podigli sportske rezultate na sportskom, zdravstvenom, društvenom i marketinškom planu. Već sada se može kazati da je Olimpijski komitet ponovno podigao ljestvicu u stepenu i kvalitetu organizacije važnih događaja i da čini sve što je u njegovoj moći da sport u Bosni i Hercegovini unaprijedi na kvalitetan način.




OK BiH: *Od Olimpijskih igara "Pariz 2024" dijeli nas manje od 300 dana. Imaš li komentar ili poruku?*

AT: Želim svim sportistima u Bosni i Hercegovini da ostvare svoje snove, da ispune olimpijske norme i da dožive pravi olimpijski duh na prestojećoj olimpijadi. Već sada treba krenuti sa pripremama za Olimpijske igre u Parizu 2024. godine i to punom snagom i maksimalno posvećeno, jer će ovo vrijeme proći veoma brzo. Za mene je najvažniji trenažni proces, tj. da odradim sve što trener traži od mene i da sačuvam tijelo od povreda. Isto tako, da brinem još više o svom zdravlju i da budem spreman 100 posto za sve što me očekuje.

OK BiH: *Hvala Amele, želimo ti mnogo uspjeha i sportske sreće na putu ka Olimpijskim igrama Pariz 2024!*



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2023. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.



IN MEMORIAM

Odavanje počasti Janezu Kocijančiču



Tokom sastanka NOK-ova Centralne i Jugoistočne Evrope, čelnici OK BiH predsjednik prof. dr Izet Rađo, potpredsjednici gosp. Marijan Kvesić i prof. dr Milanko Mučibabić, te generalni sekretar doc. dr Said Fazlagić, posjetili su grob Janeza Kocijančiča, zajedno sa ostalim delegacijama.

Janez Kocijančič je kao predsjednik Olimpijskog komiteta Slovenije, dugogodišnji član Izvršnog komiteta EOK-a i naposljetku kao predsjednik Evropskih olimpijskih komiteta, dao nemjerljiv doprinos organizovanju i jačanju, te radu Olimpijskog komiteta Bosne i Hercegovine. Ogroman doprinos je dao uspješnoj organizaciji EYOF-a 2019 Sarajevo i Istočno Sarajevo na čijem se otvaranju i obratio. Za Bosnu i Hercegovinu su ga vezala mnogobrojna prijateljstva i uspomene što je svakom prilikom naglašavao.

Veliki čovjek i sportski radnik i prijatelj svih građana Bosne i Hercegovine, Janez Kocijančič, preminuo je u 79-oj godini, 01. juna 2020. godine.